

La gnove campagne promoziônâl pai gjenitôrs

Su lis alis di une pavee a svolin la magjie dal furlan e il plurilinguism in etât scolâr

“La magjie dal furlan” e jentre intes fameis de region su lis alis di une pavee. A son chestis lis peraulis e i simbui sielts de ARLeF par une campagne impuartante di sensibilizazion indreçade ai gjenitôrs par stimolâju a sielzi l'insegnament de marilenghe pai propriis fis iscrits tai Istitûts Comprensîfs e tes scuelis paritariis dal teritori furlanofon. Il progjet al gjolt dal supuart dal Assessorât regionâl ae Istruzion e al viôt la colaborazion dal Ufici Scolastic Regionâl.

La campagne e je stade inviade ae fin dal 2016 tes televisionis locâls e su la cjarte stampade, sui social network e tes salis cinematografichis des provinciis di Udin, Pordenon e Gurize. Il spot video realizât pe ocasion al à palesât un grant sucès. Al conte, cuntun lengaç cetant emozionâl, la storie di une frute che e met dongje dutis lis peraulis che e scolte e lis cataloghe intal so armâr segret. Fin che une di... la perauale “Pavee” e cambie l'ordin des robis...

Cun di plui, in dutis lis scuelis dal teritori furlan al è stât distribuît a 60 mil fruts un depliant bilengâl (furlan - talian), cun tantis informazions sui vantaçs e su lis oportunitâts ufiertis dal insegnament e dal apprendiment de lenghe furlane intes scuelis.



Une vere e proprie vuide pai gjenitôrs, finalizade a parâ vie cualchi pregiudizi e a disvilupâ une cussience plui fuerte su la utilitât formative di cheste sielte, intant che si svinavin lis datis fissadis pes iscrizions scolastichis.

Il Regolament pal insegnament de lenghe furlane al previôt la introduzion di modui di almancul 30 oris par grup-classe o par sezion, tignûts di insegnants esperts.

Al moment de iscrizion, al prin an di ogni cicli scolastic, i gjenitôrs a segnin se - pai propriis fis - a vuelin avalêsi dal insegnament

de lenghe furlane, e la opzion esprimude e reste buine dulinvie dal cicli.

Il sproc de campagne al ricuarde a ducj che “La lenghe furlane e je vèr nudriment pal cerviel” e che - come che e à dite la Assessore regionâl al Lavôr, Formazion e Istruzion Loredana Panariti - «inte nestre region, la oportunitât di cressi bilengâi e je ae puartade di ducj e si pues cjapâ sù cun facilitât e in maniere spontanee».

La campagne “Pavee. La magjie dal furlan” e je disponibile te sezion “Cressi cun plui lenghis” dal sît de ARLeF www.arlef.it.

Pai fruts

Maman! La prime transmission televisive dute par furlan



“Maman!” e je la prime transmission televisive dute par furlan, cun filastrocjis, zûcs, proverbis, contis e divertiment pai fruts. E je realizade par cure de Agenzie Regionâl pe Lenghe Furlane, adun cun Telefriuli, e presentade di Daria Miani (te foto). L'obietif de transmission al è chel di ufrî finalmentri ai frutins dai 3 ai 6 agns un moment ludic par furlan e ancje chel di informâ, sensibilizâ e dâ un supuart ai gjenitôrs, ai nonos e ai educadôrs su la sielte dal plurilinguism, te convinzion che imparâ plui lenghis za di piçui al ufris une cjarte in plui dal pont di viste cognitîf, metacognitîf e relazionâl.

Ogni vinars aes 17.45, ducj i frutins a puedin zuiâ e cjantâ cu la presentadore e tancj ospits. Lis transmissions - che a laran indevant fin al mêis di Jugn dal 2017 - si puedin viodi ancje sul canal Youtube di Telefriuli.

Festival des arts

Suns Europe 2016. I vincidôrs

La seconde edizion di Suns Europe, che dal 1 ai 3 di Dicembar dal 2016 e à puartât a Udin e in Friûl un campionari selezionât di espressions musicâls, cinematografichis e leteraris, si è riconfermade tant che il festival plui impuartant des arts in lenghe minoritarie e un moment straordenari di contaminazion culturâl e linguistiche.

Pe Sezion Musiche, Il Premi de Jurie al è lâ, pal calôr che a à puartât a Udin des lôr tieris dal Nord, al grup Steso des isulis Fær Øer. La Jurie Popolâr e à assegnât invezit la sô preference ae fantate de vôs dorade Veronika Ushoilik (Čukotka).

Dilunc de serade finâl cuntun public che al à jemplât, in maniere leterâl, il Teatri Giovanni da Udine, a son stâts conferîts ancje il ricognossiment pe Sezion Cine al documentari “Mumisitsinerup nipaâ” di Inuk Silis Høegh (Groenlande) e, pe Sezion Leterature, al scritôr Xavi Sarrià (País Catalans).